

Naqqiut

Akissuteqaat 2. April 2019-imeersumut taarsiut
(Susassaqarfinnik allannguuteqartoqarnera peqqutigalugu teknikkikkut
aaqqiissuteqartoqarpoq)

Qanoq iliorluni nunatsinni inoqarfiit inuerukkiartortut, inuerukkiartornerisa illuanut saatsinnissaat pillugu apeqquteqaat aallaavigalugu Inatsisartunut oqallisissiaq
Inatsisartuni Siumumi ilaasortat

Akissuteqaat

(Inuussutissarsiornermut, Nukissiuuteqarnermut Iisimatusarnermullu Naalackersuisoq)

Siullermeerinninneq

Naalackersuisut sinnerlugit Inatsisartuni Siumumi ilaasortat, qutsavigissavakka apeqquteqaammik tunngaveqartumik nunaqarfiit isorliunerusullu inuerukkiartornerisa qanoq iliorluni illuanut saatsinnissaat pillugu oqallinnissamut siunnersuutaannik.

Naalackersuisut assut pingaartippaat qularnaarneqassasoq inuussutissarsiornikkut inuuniarnikkullu nunatsinni tamarmi innuttaasut pitsaasunik atugassaqartitaanissaat. Tamatumunngalu atatillugu Naalackersuisut arlalinnik suliniuteqarput, siunertaqartunik nunaqarfinni isorliunerusunilu inuussutissarsiornikkut periarfissanik kiisalu inuuniarnikkut atugarisanik tapersersuinissamik.

Nunaqarfimmi inuunerup annertunersaa aalisarnermik piniarnermillu aallaaveqarpoq. Kisiannili nunaqarfinni ataasiakkaani qerititsivinni toqqorsivinnilu inissaqartitsineq assigiinngitsorujussuuvoq. Tunisassiorfiit arlallit toqqorsiviit il.il. ulikkaarnerat pissutigalugu ukiup ilarujussua matoqqasarput.

Taamaattumik periarfissat atorluarneqarnerussappata nutaamik eqqarsarnissaq pisariaqarpoq.

Nalunaarusiami Nunaqarfinni isorliunerusunilu aalisarnermik inuussutissarsiut aqqutigalugu suliffissat amerlanerulersissinnaanerit, Naalackersuisunit saqqummiunneqartumi nunatsinni nunaqarfinni isorliunerusunilu tunitsiviit tamarmik nalunaarsorneqarput, ersarissarumallugu periarfissat qanoq ittuuneri, aammalu aalisarnermik inuussutissarsiummi aporfissaqarsinnaanera paasisaqarfigiumallugu.

Nalunaarusiami ilaatigut tikkuarneqarpoq nunaqarfiit isorliunerusullu misigisaraat imermut qaffasinnerusumik akeqartitsisarneq illoqarfinnut sanilliullugu, sumiiffinni pineqartumi nioqqutissiornermut aningaasartuutit qaffasinnerusarnerik pissuteqartartumik.

Naalackersuisut Nukissiuuteqarnermik Imermillu pilersuinermut immikkoortumi pilersaarummik eqqussinerisigut maanna innaallagissamut aamma imermut akiusut nunatsinni sumiiffinni tamani assigiilernikuupput.

Immikkoortumut pilersaarutip kinguneraa malunnaatilimmik nunatsinni sumiiffinni amerlasuuni akit appartinneqarnerat. Minnerunngitsumillu nunaqarfiit isorliunerusullu annertunerpaanik sipaarutissarsisinnegarsimapput assersuutigalugu ilaqutariit Tasiilami marlunnik inersimasortallit marlunnillu meerartallit ukiumut 8.000 kr.-it missaannik sipaaruteqartassapput nunaqarfinni aamma illoqarfinni minnerusuni, akinik annertuumik appaanerup kingunerisaanik.

Naalackersuisut Nukissiuuteqarnermut imermillu pilersuinermut immikkoortumi pilersaarutaata ilaatut ilanngullugu suliarineqartussaavoq nunamut tamarmut pilersaarut, innaallagissamik imermillu pilersuinerup, inoqarfiusuni tamani inuussutissarsiornikkut pisariaqartitsinerup tapersersuutaasussamik.

Nukissiorfiit 2018-imi pilersuinerup siullermeertumik isumasioqatigeereerput. Pilersuinerup isumasioqatigiinnermi Nukissiorfiit sanaartornissamut pilersaarutit Qeqertani kallerup inneqarfeqarnek aalisakkeriveqarnerup suliffeqarfimmu tunngatillugu soqutiginnittunut saqqummiunneqarpoq. Pilersaarutaavoq taamatut ataatsimiisitsinerit ingerlanneqarnissaat nangeqqinneqassat.

Aningaasanut inatsimmi kontumi pingaarnermi 64.01.05 Nunaqarfinni isorliunerusunilu inuussutissarsiornikkut ineriartortitsineq, aningaasalersorneqartarput Naalackersuisut nunaqarfinnut isorliunerusunullu sammititaasunik iluatsittunik suliniutigisartagaat.

Konto pingaarneq taanna aqutagalugu aningaasaliissutissanik immikkoortitsisoqarpoq kommunini tallimaasuni tamani, nunaqarfinni isorliunerusunilu inuussutissarsiornikkut ineriartortitsinerup siuarsaanissamut. Tamakkuva tassaasinnaapput suliniutit imaattut: hal-inik aserfallatsaaliineq, talittarfinnik puttasunik iluarsaaneq, angalasunut takornarianullu illuaqqat utaqqisarfiit, illuaqqanik piniariartarfinnik pilersitsisarnek, illunik sullivinnik pitsanngorsaaneq allallu.

Kiisalu aamma konto pingaarneq aqutagalugu aningaasaliissutissanik immikkoortitsisoqarpoq nioqutissiorfinnik ingerlatsinerup tapiissuteqarsinnaanermut, inuussutissarsiutinik suliffissaqartitsinerumillu siuarsaasunik, aalisarnermi piniarnermilu ingerlatsinerup annertusaasumik aaqqissuussinermut, kiisalu nunaqarfinni illoqarfinnilu minnerusuni tunitsivinni nioqutissiorsinnaanermut, ingerlatsisoqarnissaanik sumiiffinni pisariaqartitsiviusuni atorveqarsinnaasunik.

Naalackersuisullu pineqartut saniatigut kontumi pingaarnermi tassani kiffartuussinerup isumaqatigiissuteqarput, nunatta kujataani Neqi-p toqoraavianut. Kiffartuussinerup isumaqatigiissummi qularnaarneqarpoq savaanik aamma savaaqqanik, naatsiianillu savaatilinniit naatitsisartuniillu pisiniartarneq.

Naalackersuisut KNI-mut nioqutissanik pilersuineq pillugu kiffartuussinerup isumaqatigiissutaat qularnaarisuuvoq innuttaasut tamarmik, nunaqarfinni aamma

isorliunerusuni najugaqartut, periarfissaqarnissaannut ulluinnarni pisariaqartunik pisiniarnissamut, nunatsinni sumiluunniit najugaqaralarunik.

Naalackersuisut aamma Kalaallit Nunaata Ammeriviata akornanni kiffartuussinermut isumaqatigiissut piniarnermik inuussutissarsiuteqartut isertitassaqarniarnerannik pilersitsisuuvoq, puisit amiinut sinerissatsinni sumiiffinni assiginngitsuni tunitsiveqarnikkut.

Aamma Naalackersuisut takornariartitsisarnermut periusissiassaanni maanna suliarineqartumi isumaliutaavoq immikkut aallunneqassasut qanoq aaqqissuussinikkut najukkani assiginngitsuni isertitsissutaasinnaasut pitsanngorsarneqarsinnaanersut.

Takornariartitsinermut periusissiassami taamaasilluni aallunneqassapput takornariartitsinermik najukkani aallaaveqarneq, aammalu takornariartitsinerup najukkani assigiinngitsuni isertitsissutaasinnaanerata pitsaanerulersinnissaa.

Suliniutit ilagissavaat nunatsinni takujuminartuutitsinnik aalajangersaanissaq aaqqissuussinissarlu. Suliniut isumaqarpoq takujuminartut soqutigintullu eqqaanni pisariaqartunik atortulersuisoqassasoq. Siunnerfiussaaq takujuminartuutit aserfallassinnaanerisa pinngitsoortinniarnissaat, aammalu isertitassatigut periarfissanik aaqqissuussisarnerit, innuttaasut najukkani isertitassaannik pitsanngorsaataasunik, assersuutigalugu tammajuitsussanik nioqquteqarneq, takornariartitsisulerlunilu angalaartitsisarnerit.

Nunaqarfittaaq takornarissanut immikkuullarissunik misigisaqarnissaat, unnuisarfinni unnuisitsinerit, arfernik misigisaqartitsinerit kiisalu nunaqarfinni inuunermt misigisaqartitsinerit aamma pinngortitarsuup kusanarluinnartup qanimut misigitinneqarnissaat periarfissaallutik.

Nunaqarfinni isorliunerusunilu taamaasilluni imaannaanngitsunik takornariartitsinermi periarfissaqartarpoq, misigisassarsiortitsinermi naleqarluartartunik takornariartunut, ilutigisaanillu suliffissaqartitsiviullunilu najukkani aningaasarsiornikkut ineriartortitseqataasartunik.

Tassalu tapiissuteqartarnermik aaqqissuussinerit arlaqartut suliniutillu periarfissaapput, taakkualu tamarmik siunertaqarput nunaqarfinni isorliunerusunilu inuussutissarsiornikkut ineriartornermut tapertaasussatut, tamakkualu aamma suliniutaalerumaartuni ilaatinneqassallutik.

Kalaallit Nunaanni aningaasaqarnerup imminut nammassinnaanerunissaa aammalu ataatsimoortumik tapiissutit pinngitsoorsinnaanerunissaat, ataatsimut isigalugu Naalackersuisut kissaatigaat. Aningaasanut inatsisissat akuerineqartarnerannut atatillugu suliniuteqarfissani nutaani pingaarnersiunitsinni tunngaviusoq taanna pingaaruteqarpoq.

Naalackersuisut qilanaarisimavaat pitsaasunik tunngavilersorluakkamillu inuiaqatigiinni apeqqummi taamak pingaaruteqartigisumi oqallinnissaq.